

晚晴移詩匯

晚晴移詩匯卷一百十目錄

吳文溥 十八首

彭兆蓀 二十一首

錢杜 二十二首

慶蘭 四首

吳德旋 四首

朱文藻 一首

金學蓮 七首

楊鳳苞 四首

潘瑛 四首

吳照 五首

王文誥 十二首

韓是升 二十四首

鍾大源 十三首

夏宗沂 五首

晚晴窈詩匯卷一百十

徐世昌

吳文溥字博如號澹川嘉興人恩貢生有南野堂詩藁

阮崇臺曰澹川詩爲浙土之冠關中草闕游編尤爲直逼古人余出先大父征苗刀示之澹川走筆作歌震奪

一府

詩詠澹川應召試未遇老於幕府畢余山阮儀徵並重之李香子贈句有云海內羣推一名土座中傾動五諸侯詩有雄駿之氣而醞釀深醇非同浮響著筆記十二卷評騰同時作者持論不苟

越中秋曉

木樨晚花香有無鬢絲禪榻清秋徂殘月在門僧在竹竹  
裏琴聲出茅屋須臾衆山喧鳥哢霧洗千峯削寒玉磐陀  
日出天地紅海水飛挂扶桑東陰潭影倒龍蛇壁古殿棧  
戛瓊瑤風上山下山白雲中手挹沆瀣超鴻濛他年有客

來訪我赤城瀑布天台松

登潤州城樓

滿眼飛花作客愁東風吹我上城樓  
翻江白日春沙遠繞郭青山宿霧收  
半壁金陵空虎氣數帆瓜步老漁舟  
汀蒲渚柳真無賴送盡南朝綠未休

春暮金陵寓舍書懷

問訊青溪長板橋到來花月旅魂銷  
美人短命青山老草草春風過六朝

瑯琊幕府倚天開結綺臨春舊綠苔  
忙殺石頭城下水降帆才過戰帆來

入關馬上作

前山復後山莽莽山頭月古人復今人  
纍纍山下客朔風

當馬嘶征車夜中發星河落人面冰雪稜馬骨壁立上蒼  
蒼雞鳴關塞白

信宿驪山下雨歇聞林鳩虛巖韻幽籟返照明高秋韋公  
蘊真處想見逍遙游泉石餘綺麗衣冠邈巢由勝事行已  
矣空山我何求

九嶷何巘岈涇水注其麓山風吹野色霜草寒無綠去鳥  
戀餘暉流雲動疏木當時祀雁上佳氣連黃屋炎精颯已  
遙神物代相屬鬱鬱松柏林下有狐兔宿立馬意蕭條秋  
山問樵牧

太乙下深黑雷霆駐虛空有龍宅其湫飛雨白日中南游  
女媧谷北上銅人原荒岡駢叢楚古闕生墟煙山河美如  
此人壽速若彼去去且爲歡沽酒新豐市無使明月來照

我空持杯

青青原上麥烏鳶自相逐我行苦朝饑藹然飽春綠望雲  
陟高邱采芳下西麓念我堂前圃白華有餘馥媿彼循陔  
詩徒倚迴車轍

甘泉山

清辰策馬暮留宿盡日看山興未足嶄巖路絕披蒙茸百  
道山泉挂雙目憶昔避暑五月中撓旃翠羽森谿谷冷風  
飛落通天臺寒門雲霧虛徘徊馬犀夜走金壁景太古玉  
樹高花開快泚神壇連紫極七星北戶招搖來西京文章  
動王眷武皇扈從皆仙才長卿麗筆不曾賦子雲藻思嗟  
何暮故知此物亦有數獨向蒼崖問歧路

短歌

北走出雁門西行渡臨洮問君何所往飲馬長城濠舊隸  
羽林籍新佐霍驃姚長揖請論事軍門夜橫刀一麾入虜  
穴義激天爲高飛鳥不敢下邊秋氣蕭條安邊主將略汗  
血諸軍勞男兒重知己慨然生死交生死且不顧論功徒  
爾曹

青門觀侯生舞雙劍贈益都沈八丈歌

侯生袖中兩秋水飛出芙蓉亂紅紫虛堂白日走精靈夾  
電穿空血人背須臾一擲幾千里碧海無聲老蛟死座中  
蒼髯七十翁滿酌金罍爲生起自言年少時頭角亦頗奇  
彈棋與擊劍遊戲無不知雲門山中有老屋穆陵關南春  
草綠千年猛虎射殺之徒手向前拔箭鏃朝馳燕馬問盧  
龍夜脫吳鉤舞鶴鴒美人如花客如玉往往哀絲間豪竹

分金呼管鮑作賦邀鄒枚肝膽時因酒邊露笑口卻向杯中開聞道秦皇古碑在興酣獨上瑯琊臺當時搔首隘八極未肯埋沒隨蒿萊豈知如今意蕭瑟入蜀游秦計轉拙青門瓜落秋風多白頭看劍當悲歌送窮景短奈老何嗚呼途窮景短奈老何

故西川將軍奎公林輓歌

江盤邛笮西連徼河繞崑崙北入秦本意兩軍相犄角豈期中路忽參辰驃姚戰伐飛騰在僕射英雄涕淚新自昔平羌功第一不因外戚重親臣

褒鄂弓刀動鬼神丹青世世照麒麟祁連山遠冰霜古蜀國風悲草木春激烈肝腸爲知己摧頽歲月感斯人百年天地誰長在所恨飄飄未死身



同海虞毛瓊秀水王生登獨秀峯訪小顛上人

看老青山色雲中一箇僧垂蘿煙裊裊落葉路層層野院  
鳴秋磬湖樓見夜鐙南屏最高處明日待同登  
諸子興不淺老夫情復深松風涼掃榻竹露靜張琴支許  
忘形契宗雷入道心回頭巖際月猶有未歸禽

客游金陵過隨園訪袁太史

舊是神仙職羣資大雅才異書傳嶽瀆短夢到蓬萊勝絕  
塵寰外天然石室開白雲爲留客不放出山來

阮將軍寶刀歌

將軍偉然淮海豪身長九尺腰帶刀讀書萬卷不得意要  
扶鰲極搏鵬霄天生奇材必有用持戟殿前色飛動名標  
宿衛蒞親軍出試戎韜歷蠻洞乃者紅苗暗九谿苗氛漲

毒谿東西夾岸旌旗天杳杳萬山鼓角聲淒淒將軍手提  
三尺鐵夜半橫行入虎穴飛落空中霹靂聲白是刀光赤  
是血五寨榛蕪路已通南山負嶠尙潛蹤爾時總制張經  
略馳檄將軍趨首功將軍突出間道口矢石在前追在後  
裹瘡轉戰九死餘縋險梯空身不有捷書申報大府來枷  
杻赤立啼塵埃力勸受降止盡殺豈知骸骨半成灰橫坡  
老稚將不免苦賴將軍丐殘喘好生惡殺上帝心忍以民  
命同雞犬至今九谿千萬家將軍功德流無涯試看當時  
寶刀在英靈出匣生風沙不見于公駟馬呂虔珮早卜他  
年子孫貴公侯將相非偶然義結仁深動天地此刀殺人  
復活人蛟龍氣涵江海春寄語人間報恩子忽棄螻蟻爭  
麒麟

彭兆蓀字湘涵號甘亭鎮洋人諸生有小謨觴館集

詩話甘亭早慧其父官甯武侍游塞上朔管霜笳文  
情壯越居十年奉親南還家中落客江淮間聲譽益  
起其詩藻采擬淵穎風骨亞青邱氣局音律數空同  
大復邵荀慈論文謂當於藻麗豐得之中存簡質清  
剛之制甘亭詩殆近之甘亭故工騷儷在曾賓谷幕  
中撰定騷體正宗標示軌範傳誦於時兼通考訂校  
讐之學客胡果泉所與顧千里同校通鑑文選並爲  
善本晚年學道旁及內典有懺摩錄之作蓋又深究  
身心不欲徒以文章名也

鎮朔樓十二韻

甯武緣山爲城北門其最高處上建樓曰鎮朔雄麗揭孽屹峙萬山中爲

一郡之望明季季自成攻城時所發鉛丸矢鏃尙纍纍窗戶間可捫而數也

傑構基扃護飛壺旭彩浮登高今勝地築塹古邊州盤漠  
雕時下摩空雁亦愁秦雲遙欲壓朔氣冷全收蛾賊連羣  
日狼煙上將憂勢眞同燕幕交幾失蛇矛颯沓星弧落碣  
礮奔石投貙熊千歲劫猿鶴一軍休關路清烽燧郊竿裊

旆旂黃雲屯敗棟碧血鎖危樓目斷龍堆戍魂招鹿塞秋  
寒風悲壯士終古自颼颼

枳兒嶺

飛梁繞修蛇怪石劈鬼斧人聲出天脊馬足洞山腑直下  
皆懸厓決決暗泉吐千年闕頑陰有眼孰敢俯路窮見斜  
徑峯轉得小聚戶稀常斷炊煙淡不成縷荒祠兩三間白  
日慘牆土敗佛無全身貌與樹爭古殘魂弔天驕畏路避  
渴虎淒唱山雀吟前峯仍午午

八達嶺

兩巖夾層雲綫路爭一指峯高不肯俯偃蹇瞰天咫我行  
登頓疲計險忘計里呼風馬批耳嚙腳石排齒嵐靄北條  
來蛇蜒撲眉紫奇哉老太行元氣果不死憶在明中葉三

輔屯錯峙建瓴俯神京居庸列其趾時清脾埃疏道古榛  
菅迤日昃聊停驂秦城倚殘雉

宣府

龍堆夜氣接漁陽獨倚和門望大荒玉帳照斜三輔月金  
笳吹老一城霜燕支山遠秋無色拔里臺傾土尙香愁絕  
孤亭圍萬柳絲絲風入鬢邊涼

宣仗離宮建羽旄當年巡幸肅弓刀卻來御苑憐黃土誰  
使將軍號赭袍芻幕寒支謙磧遠花臺秋颭隼旗高鷹坊  
虎圈悲風起和入長松作怒濤

夜起

手拓籌邊樓四隅黃花嶺接小單于蒼煙不動亂山睡看  
仄一丸秦月孤

羌笛慣飛邊柳葉霜笳能說落星心四更虎氣出城角風  
色怒來聲滿林

鴉

魚鱗霞尾送哀音接翅荒城和斷碁輸與江南鶯燕侶夕  
陽邊有萬愁心

寄題故明孫白谷尙書郊園

尙書邸第近城闔老屋當年綽楔新龍漢已更浮世劫鶯  
花猶爲故侯春蒼黃殘卒哀庚癸惻愴斜陽話甲申卻指  
秦雲通雁塞函關西望一傷神

壽陽驛感韓文公事作

幽州兵向深州舉尙書不與健兒語么麼種出阿布思血  
衣那記先太師侍郎宣慰辭京闕獨以一人探虎穴圍花

巷柳總關心，淒絕團團馬頭月。嗚呼縣官安復危，韓愈可惜知者誰。朝廷祇救牛元翼，獨不見希烈懷光殺齋勅。

賣馬行

廣陵門外人如織，牽馬市頭問馬值。金珂玉勒不被體，風鬣霧鬣無顏色。憶從渥洼聯轡來，黃驄紫燕非凡材。慣踏層冰陵雁磧，幾驅朔雪眺龍堆。羈人一唱東歸引，欲別驂騮良不忍。款段還思下澤游，鄉程先仗霜蹏緊。并州已過歷齊州，茸帽蕉衫穩上頭。有約衡門飽場藿，不教塵土走長楸。寒雲慘淡淮南道，卻顧囊錢空似掃。已無白飯養諸奴，那辦青芻充馬草。關河相對愁心顏，山程水驛多間關。安望越裝分陸賈，直須駱馬鬻香山。脫付青絲馭人手，論價還看步工否。故將醜語詆權奇，認使吞聲伍衰朽。得錢

便可作歸資多寡安能重致詞從來失路身多賤此後鞭  
笞吾豈知馬聲嗚咽人聲遠不于河干日將晚莫憶春蕪  
射雉場莫提淺水呼鷹坂只合歸營二頃田飯牛扣角過  
年年綠楊陰裏誰家子叱撥呼風試錦鞵

滁陽

陂塘花鴨水粼粼苦竹叢蘆絕點塵一抹瑯琊山色好始  
知身是過江人

清流關

嗟峨怪石橫天起一徑羊腸萬山裏東憑江浦北陰陵此  
是南唐舊軍壘彭奴遺跡空岩巖巖福州下蔡成煙消赤眞  
人自大梁至山前十萬橫相要金樽璀璨銀樽白犀帶名  
茶枉傳驛刺史驚看綠堞兵將軍悔履秦淮石澄心堂上



草連雲古殿長春半夕曛  
蔗漿未啜雄關失猶說陵波水  
上軍

州來

州來故國壽春東鬱鬱蒼山指八公  
蠟樹遠排淮甸直魚雲晴曳楚天  
空銜刀慷慨于銓節折屐飛揚謝傳  
功何似  
召南行義好辦香吾只祝安豐

題錢舜舉春社圖和子白作

黃鴉穀穀鳩雨晴十家五家挈隊行  
神錢花鼓各霑醉紙上一片酣嬉聲  
斜陽萬條翠隴明前後人影交欹傾  
桃花如雲攔路迎千紅笑與酖顏爭  
社公酒足神應享禾黍今春定豐穰  
歸來穩卧三重茅不怕催租打門響  
玉潭畫人兼畫神一一想見羲皇民  
如金王度不可做繪此熙皞堯

天春不隔南阡與東畝太和益益歌盈阜須知天子萬年  
觴只視春農一杯酒鄙人家住東吳東桑柘亦有蓬蒿宮  
三升治蠶看人醉醒眼妒煞雞皮翁薑稜瓜區都賣卻牛  
王廟前鄉夢惡無田無酒我不惜惜此身當太平日不然  
摹取先生筆攫身入圖添我一有手不把犁與鋤請君卷  
卻春社圖

相逢行答吳江郭頻伽

磨

鸞鷲巢椅桐鴛鴦睇層雲光儀匪遠兩脈脈要與黃雀羞  
同羣淮山叢叢水舒舒乞食胯下橋邊趨有美一人佩瓊  
琚類同王孫立路隅神龍揚光不見燭塊獨游子心煩紆  
子奏晨露我歌咸池飄風過耳忽焉感之一尺瑤華枉先  
報繼以妙詩申篤好清風褰帷月當軒通詞布素馨若蘭

相逢絕似溝水頭便學二鳥鳴相酬各挾勝事三千秋弟  
畜灌仲孺兄事袁將軍天涯落落幾國士到眼餘子徒紛  
紛星萍勞蹤事無定不惜裏言爲子罄野棠未落山櫻然  
韓侯臺前送離船相逢卽相別相憶行相憐願君爲夔我  
爲虻勿問市頭諸少年

曉起

龕鏡半難宿火暝翠羽花冠一聲斷微聞金井響轆轤漸  
覺初陽晃朝眼散髮不簪坐深室手拓櫺窗望蕭瑟骨健  
全收朔氣清木枯淨寫天容出瓦溝一白何輝輝凍雀啅  
枝噤不飛秋冬行罰古令垂殺物都仗嚴霜威東關酸風  
盍來速蔓草當階色猶綠

獨坐

此生豈合注魚蟲，獨坐芸籤藥裏中。  
疏密隨時梅子雨，高低無定柳條風。  
神仙許掾家何有，人物班書論未公。  
只擬襄陽求水鏡，便從王粲記英雄。

明宣宗恭讓皇后賜印歌

印方徑一寸三分，象牙爲之，陽文篆厚載崇教之寶。

六字鈕作相輪形，左右分鐫眞書宣德四年正月，賜靜慈宮十字，故明宣宗胡皇后御用章也。按宣宗時孫貴妃有寵，陰取宮人子爲己出，而後未有子。三年春，帝令后上表辭位，退居長安宮，賜號靜慈仙師，別冊貴妃爲后，史稱后賢而被廢。天下憐之，帝後亦自悔，曰：「此朕少年事，斯印之賜乃在四年，則猶初入道之時。」歟。古餘太守得此印於嘉禾曹氏，屬予作詩記之，因成長句。

朱礬麝酒餘香漬，桃花色映迴鸞字。  
牙璋小璽出中宮，宣

德當陽四年賜宣廟中興，似成祖涕上徽章陰鄧伍。  
后濟甯人

玉燕初徵瑞石祥，穀圭曾作長秋主。  
高徐家法在椒房，任

姒周旋禮數詳。豈有斜封譏墨勅，定膺優眷選名璫。  
君恩

一旦難常保高祿弓鞬勞祈禱鉤弋旁開堯母門瑤宮不  
長宜男草鞠衣教卸著黃紵別有昭陽寵渥多蘭殿金人  
拋手鑄上清琳札自摩抄沈沈永巷佛香吹聖善威姑早  
暮隨謂張太后差勝寂陵悲乙弗不須雲母羨昭儀此印傳宣  
出至尊九重深意表丹文修真已改披香號坤德還留故  
劍恩迴首娥臺只三載金螭虎鈕叨封拜中壺長辭鐵字  
書天章枉熟紅牌誠瑩質蘭函伴幽獨筆牀硯匣隨簫局  
斗檢塵封女史箴芝泥但印長生籙覘眼滄桑劫灰燼遺  
珍流落當瑤瑾織室音塵蔓草荒麻姑爪迹依稀認玉鉤  
斜畔月纖纖高館淒風閃軸簾莫同團扇捐秋篋留向長  
門賦上鈐

劉松嵐觀察

大觀

見示詩藁率題其後

獨餐海岳秀不尙悅  
罄辭冷抱有孤寄  
熱官無此詩  
釭花宵燼後  
諫果味回時  
欲結參寥契  
心香問導師

夜坐

霜鴻聽徧羽譙譙  
鐙影樽前懶不挑  
風雨檐花都錯落  
江湖魂夢亦漂搖  
何年黃鵠陂能復  
豈有紅羊劫未消  
欲問故山漁釣侶  
可容瓢笠穩團焦

錢杜原名榆字種庭更字叔美號松壺仁和人工部主事有松壺畫贅

陳雲伯曰吾杭鄭虔三絕向推奚君鐵生冬花庵詩佳矣視畫猶有間叔美以貴公子落僂投荒百蠻騎象南踰歐閩西陟峩岷中年雞輦下更往來古戰場所作畫類文衡山更深於北宋荆董諸家幽秀窈窕而其爲詩又超妙清曠眞氣往復上之追躡太白次亦不失爲嘉州龍標所詣如是豈非湖山靈秀獨鍾於斯人之筆端耶

詩話松壺畫齋二卷多自題所作姚春木詩云濃淡  
平奇妙合并畸人身世著書情雲林高致南田韻不  
覺前賢畏後生別有畫憶二卷紀其平生所見如云  
古法不可失習俗不可染於究心是道者宜少有裨  
益年八  
十二卒

同孫子瀟步月賈氏廢園卽圖其意

幽港沈荒煙江月上城半人影穿林來一一若秋雁扣門  
悄不膺一地涼陰橫主人邀客坐隔竹風鏹聲竹深秋意  
生月欲與人語仙鶴飛出牆桂花落如雨

斜月已過橋籬影澹如畫時有秋蟲聲蕭騷雜秋話話長  
客欲去池上雙扉開庵僧苦待客故使山鐘催歸來隱几  
卧夢落西溪水波影滿船頭白鷗呼不起

花將軍營中駝羅驄馬飄警善戰云自西藏中所得

索余貌之是日席上姚太守施總戎及諸幕僚各

爲一詩豪岩感激之意可以傳矣

黔西都護鞍馬雄驍勇第一駝羅驄來從流沙走萬里滿  
身汗血桃花紅黃鬚健兒控不得出陣入陣生旋風拳毛  
颯爽神骨聳世無曹霸誰能工昔日善畫李伯時吳興承  
旨能匹之星精未許俗手貌諸公况復爲新詩紫金盤陀  
七寶串雄姿尺幅開生面櫪下牽來意獨豪營前騎出人  
爭羨萬人辟易戰士呼突圍夜上山梁趨四蹠蹴踏砂石  
裂項下憫體如貫珠飛身擊賊賊膽碎將軍新破松毛寨  
卸鞍猛氣猶奪人十萬降苗帳前拜軍中搥鼓軍門開巴  
西太守攜客來酒酣磅礴解衣看午夜壁上疑風雷憐余  
屢貌尋常者神駿須從醉中寫玉鞭明日下安籠看掃櫬  
槍洗兵馬



山樓吹簫圖送張叔虎歸吳淞

雲安山樓夜吹簫江上潮平送行客三巴一夜秋已生江  
船欲開聞簫聲簫聲嗚咽樓頭起月明吹落巴江水誰是  
吳淞張季鷹蘓鱸歸思秋風裏闌干百折穿鳥巢腳下颯  
颯聞江濤出峽還愁夜猿急舉頭惟見蒼崖高舟人催客  
前灘住酒醒夢覺知何處篷影全遮碇口煙槽聲猶繞樓  
前樹今夜山樓送客歸幾時吹簫故園扉他鄉莫忘茱萸  
酒只待江南白雁飛

滇中黑龍潭有古梅兩株唐時物也未谷爲設闌楯  
索余圖永之於石

疏香拂拂吹面來黑龍潭上梅花開紫雲吹影落波底碧  
琉璃浸紅玫瑰尋山慣騎款段馬叩門不許奚童催道人

揖客山院靜風鑪茶沸喧殷雷老榦盤空見鬚髮蒼鱗卧  
地栖莓苔蟄龍一睡不復醒鐵遂吹破雲千堆誰人手攜  
入靈境傳聞天寶當時栽千年劫火燒不死支離孕結丹  
砂胎人生安得如汝壽古佛含笑天公猜老夫十日面青  
壁放筆自喜無纖埃山空杳冥天籟絕枝底只有山禽陪  
夕陽倒射殿角赤花光人影相徘徊鶴聲送客入城去衣  
上染得朱霞回

仿范寬關門飛雪圖送李子愿之遼左

毳帳紫明駝蒲桃玉叵羅西風吹落葉飛滿大凌河大凌  
河頭嘯早鴉錦州城裏彈琵琶琵琶絃澀凍不響松山杏  
山雪一丈送君走馬深雪中白狐戰裙烏角弓馬毛旋空  
風怒吼冰底鬪懽隨馬走東望瀋陽城夢見居庸關春風

有時來征客何時還君不見出關枯草黃入天密雲道上  
拋榆錢

月林草堂圖

舟下巫峽泊野岸間新秋苦熱乘月步  
入村落有祝翁者具酒榼留客終夜譚

近事頗詳爲之憮然歸舟寫此  
爲贈時戊辰七月二十四也

青天明月不可招飛入君家草堂裏檐前一道秋河明萬  
樹寒聲落窗几村南村北人悄然細路礪犂穿谿田白鵬  
引客入煙竹拄杖敲門月中宿

一叢兩叢山桂花三點兩點秋星斜水禽爭宿觸溪籬野  
碓激水翻風車主人留客鐙下語訴說從前亂離苦夜闌  
幽咽不成聲一院秋蟲落如雨

龍鍾白髮雞皮翁前年避賊來巴東牆摧籬折仙鶴死巫  
山野火燒天紅可憐林際荒寒月照徧秋堂黯無色五更

屋角狐狸號城中，欄腰三尺高。  
人生能著幾兩屐，便扶筇杖尋名山。  
峩眉仙人冰雪顏，贈之靈藥辭人間。  
峩眉遙遙不可接，遠向秋林看明月。  
明朝飛櫓下巴陵，三峽猿聲夜蕭瑟。

息廬圖送李柯溪南歸

萬里送君殊可憐，一廬風月足清歡。  
身離幻境眞飛鳥，貧戀殘書勝拜官。  
揮破俗塵蒼玉塵，消除沈困紫龍團。  
莫嫌地僻經過少，細竹幽花次第看。

未谷在雲濤寺避暑余往訪之清齋三日而別爲留  
是圖作佛前清供

谷口來尋鄭子眞，茅庵寂淨無塵品。  
泉愛結煙霞侶，乞食能參定慧身。  
潭上僧歸留破鉢，松頭龍挂剩殘鱗。  
碧嶠

溪上堪消晝便挾圓瓢與卜鄰

楊升庵先生象

先生象滇中有三本一在永昌鐵樹嶺作道士裝一在大理寫韻樓作處

士裝一在昆明陸爾玉家作冠服象蓋晚年弟子所摹此臨昆明本

萬死投荒落魄人偶然重現宰官身  
金雞遠寄東華夢杜宇空嘯故國春  
關塞魂歸雲似墨琵琶聲斷雨如塵  
哀牢幾樹垂垂柳尙識前朝放逐臣

題團扇

碧天涼影亂嘯鴉水調玲瓏唱落霞  
夢入小紅橋外路四圍風柳一湖花

樵雲西老人荒率意

荻蘆陰裏小徘徊薄暝輕舸且未開  
山葉打篷風拍水蟲聲如雨過溪來

峨眉山月

巴江秋老泛舟瞿塘三峽間薄暮輒舉杯看峨眉山月沙鳥自來親人平生壯游自

此始矣

嘉陵江遠望峨眉滿地殘蘆月上時不管瞿塘風浪惡小篷窗底自題詩

白帝城邊樹萬層黃牛峽裏上秋鐙沽得郫筒好春酒不辭風露下巴陵

出嶺入嶺山鐘聲上灘下灘螢火明一隻鷓鴣引人去自敲風簟看潮生

巫山巫峽滿秋煙山木蒼蒼冷到天兩岸猿聲休太苦青溪歸客未曾眠

灞陵怨別

甲子暮春自西安之嶺中何子伯引莊子雪鴻借客攜酒送余至灞陵野岸灞上自

庚申辛酉間爲賊蹂躪非復曩時風景相與徘徊荒草叢棘中座有李生善琵琶彈灞陵秋一闋四

坐愴然李生舊家灞岸前年自賊中來頗能言其  
情狀今城郭如故人民已非坐客爲流涕久之感  
時傷別情  
見平詞

終南殘月挂城頭花落旗亭水亂流不用風前折楊柳  
琵琶彈出灞陵秋

樹裏黃河繞塞長邊風吹角水茫茫關西老將頭如雪  
醉倚弓刀說戰場

冷落東風萬柳絲銷魂橋上立多時酒痕狼藉春衫溼  
休唱何堪絕妙詞

慶蘭字似村滿洲旗人諸生有小有山房詩鈔絢春園

詩鈔

詩話似村爲尹文端子夙抱羸疾未四十而卒嘗從  
隨園游詩亦近其體而神采高朗吐屬自是不凡

秋日卽事

秋光半院夕陽西散步清樽手自攜花滿欄前人影瘦雨  
餘山外雁聲低湘簾風細波初動曲徑苔深路欲迷好傍  
小窗安茉莉愛他香晚透玻璃

芳園

芳園楊柳帶煙和聊試樽前一曲歌欲透春光簾半捲好  
收山色鏡新磨鵲非報喜何妨少雨縱澆花也怕多解事  
小溪知我意卻從竹裏抱琴過

卽景

碧天雲淨雨初收水滿平橋卻礙舟忽聽屐聲叢竹裏是  
誰先我上層樓

新柳纔青鳥未遮釣竿好趁夕陽斜園中細草憑他長多  
恐鋤時誤去花



吳德旋字仲倫宜興人諸生有初月樓集

詩話仲倫以古文名於時雅近桐城詩以溫  
柔敦厚爲宗不事雕琢五言有陶韋遺韻

友人有問余詩法者走筆答之

君莫問我詩我詩多變格知音最蚤惟陸君

以

許我清才

世無敵自交仁和宋左彝風人之意時一窺南朝鮑謝不  
可到側豔往往如溫岐吾州數子才不羈論議絕出高難  
躋南宋不數陸務觀中州姑置元裕之嶙峋坡谷猶下乘  
更誰比數詩人詩我今偏得采詩法不論濃淡與平奇但  
須妙合興觀羣怨之大旨導源三百其無迷

到家後輓張介軒

江鄉舊侶多零落詩酒過從獨有君小別那知成永訣他  
年誰與定吾文難忘共步橋邊月未忍回看渡口雲一卷

芳華初袂草幾迴吟諷對鑪薰

蟋蟀

蟋蟀將在堂君子尙行役行役無歸期愁思向誰說明月上簾來光流玉鏡臺含情屬明月莫更入羅帷

懷人

懷人春夜坐坐久微風生遠遠聞清吹誰家玉笛聲開簾納歸燕倚檻聽嘯鶯苔砌露偏重花檐月倍明頽思方就枕惆悵曙雞鳴

朱文藻字映濬號朗齋仁和人諸生有碧谿草堂詩集

詩話朗齋本貫建甯居白眉村有泉曰碧谿及徙杭州仍以名其堂示懷鄉也館汪氏與湯尹亭孫愛白趙恆齋張栽軒及汪氏羣季滌原兼山秋巖行古投壺禮分題賦詩錄其尤者曰投壺詩存嘗佐阮芸臺輯軒軒錄王蘭泉輯金石萃編自著書十餘種說文繫傳考異四庫著錄

妝域歌

妝域黃小松司馬所藏乃琢象齒爲之其體圓徑二寸五分而底稍隆起正中有一小

六稜突起臍中卓一錐長三分寸之一麤如鏡心而不銳可使几上旋轉者卽此錐也六稜周刻小楷字自右而左順讀曰甲寅年七月二十四日造李得仁蓋萬曆四十二年也

日月雙跳似丸轉老大頭顱堆雪繭書窗瞥見兒嬉物少

小情懷忽追緬物名妝域始前明神宗晚歲事游晏深宮

晝闕寂不諱宮人製此長日遣切磋象齒三寸圍中卓鐵

錐五分淺仙山樓閣雲樹重二鹿馴行踏蒼蘚一面深刻

壑藏舟仙客攜琴方陟巘甲寅七月二十四李得仁造字

可辨此非鐘鼎及刀劍款識何須仿彝典朝廷製器小亦

謹不使良工沒其善無如大事荒於嬉玩弄江山任偃蹇

傳一二世乾坤傾欲立錐無尺土踐正如此器旋轉休圍

輪都付浮雲卷百八十年物幸存笑語疑聞聚婉變搦文

紀事附金石物不足多事須勉腐儒不敢歲月荒垂語兒  
曹戒游衍

金學蓮字子青又字青儕號手山吳縣人諸生有三李  
堂集

詩話子青五歲學韻言心慕太白長吉義山遂以三  
李顏其堂自言無三李才而遇窮乃數倍之其讀李  
昌谷詩云詩人故傷心傷心乃如此矧聞天上  
樂那不少年死亦自寓其抑塞憔悴之意耳

杪春閒情

東風吹草綠滿衣山南山北春已歸落花如雪楊花飛楊  
花入水不知處無心已化浮萍去

毘陵驛

客子眠遲夜寂寥短長亭畔短長橋行程數到毘陵驛歸  
夢無多弟二宵

清河曉發

城牆侵曉噪烏鴉蘆荻連天屋外斜水落黃河全改岸風  
晴白野半飛沙車聲繞路二三輛酒店垂旗四五家咫尺  
濁流猶待渡褰裳依約上星查

友人招泛秦淮以病未赴作此柬之

酒氣香痕總寂寥珠簾晚地詠嬌嬈秦淮水冷無三伏楊  
柳煙深有六朝幾日清歌方宛宛近來篷頂已蕭蕭青溪  
白塔都依舊祇欠閒情過板橋

讀李昌谷詩

詩人故傷心傷心乃如此矧聞天上樂那不少年死一官  
但協律商聲變爲徵豈其賞音人不及秋墳鬼

讀李義山詩

當途不知才，輒復詆其行。叢臺多妙喻，風雅未爲病。溫段雖同工，弱靡難一振。後來西崑體，迺以清麗勝。

移居始定有成

健羽知秋亦倦還，白雲無際掩柴關。才當盡處思投筆，望轉奢時想買山。俗客不來因好靜，古書相對可消閒。祇應爛醉南窗酒，十月芙蓉已半殷。

楊鳳苞字傳九號秋室，又號黃汧歸安人。諸生有秋室集。

浴馬歌

八旗廐馬高纏髮，庠社旣祭臧僕同。乘秋放牧東浦東，黃衫老奚最趨雄。指揮按轡搖玲瓏，銀鞍解卻香羅幪。四蹶決波行若空，一形十影流鏡中。葑綠倒暈桃花紅，圉人躡

浪學鳧翁輕爬短刷開肉騃振鬣躍出上跨虹柳陰銜尾  
嬉涼風籜雲駿氣非蠶蟲皇圖萬里車書通烽火不徹甘  
泉宮西域歲貢青海馳天間上駟芻豆豐縣峯薄日伏阜  
終何事汗血矜奇功

後浴馬歌

昨日浴馬三隄閒今朝浴馬九曲灣十什五伍濯雲錦沙  
岸顧影高如山銀鬣雪浪皎秋練魚海龍堆眼中見翻騰  
倒捲條支波不讓昆明習水戰臨安舊是宋行都炎興馬  
政非良圖邕管岷黎歲開市百綱驛送傳軍符白石茅灘  
屢大閱超驤萬匹森成列蘭筋礮磊寶鉸纏駿尾蕭梢五  
花纈是時淮北數出師內廢火印專監司蘄王已去鄂王  
戮縱饒鐵騎空爭馳江南設險在天塹千里軸轡上流占

金縉休擲川廣秦逸足何曾得騰閃六更寒盡王氣終夕  
照冷落勝西東神駒貢到芾郎國游牝飽秣重華宮我朝  
考牧鑒前代騏驎院滿蠨螭塞對此想像玉河頭堵牆觀  
者雀翎隊

城濠覽古

廢隍尙見黑雲屯歎息三興破楚門錢俶錦衣空內屬尉  
佗左蠶漫稱尊白駒北夢舟中夜黃葉西風水外邨當日  
羣雄總安在野烏嘯上女牆昏

暑夜

暑雨蕭寥向晚收小庭夜景近新秋一林露葉約涼思滿  
地溼螢如水流

潘瑛字蘭如江都人諸生有晉希堂集



詩話蘭如僑居懷甯輯詩萃奉歸愚爲準則所作  
氣格清迥不落凡近王柳村以此同時之吳澹川

保安驛

嘉慶二年三月十三日賊犯河南葉縣保安驛丞張某力戰死其子履謙同被害翼日

復廷驛馬蹏習悲鳴賊  
怒皆殺之爲賦此詩

妖星墮地羣賊來縣官不出城不開保安驛前驟聞變殺  
氣呼聲若雷電驛丞大叫招鄉兵鄉兵未來丞獨戰戰死  
猶聞手握刀兵來不救相呼號殺賊報仇丞有子賊槌擊  
之不能死死君得死死父生一生一死真豪英是時火照  
天地黑驛中無人惟有賊賊前爭馬馬人立奮鬣悲鳴控  
不得賊怒殺馬如殺人馬死不從賊氣奪此豈有物爲之  
憑義烈所激神奇增我聞王師十萬若貔虎將軍拔幟誇  
先登奈何追逐苦不及賊果有翼能飛騰嗚呼此馬與此  
丞後之聞者猶當興

對菊

離根獨徙倚愛此清秋光月瘦見眞色風嚴無雜香客心  
勞永夜蛩夢冷幽廊搖落嗟應晚寒花莫畏霜

寄懷王夢樓

皖山向京口月出海風清虛水鑒眞性高雲入遠情江東  
耆舊少天下布衣輕垂老相思切江潮春水生

懷鄧石如山人

春雲布溫夜幽草抱寒心念此谷風遠相思江漢深孤蹤  
渺無際湘月有遺音歸計如何得天涯老病侵

吳照字照南號白厂南城人貢生官大庾教諭有聽雨

齋集

王蘭泉曰照南才華清綺軼蕩不羈詩以唐人爲師  
通六書又工畫竹人以爲金錯刀之比予江西門人

有三吳之號謂雲  
衣蘭雪及照南也

白山茶歌

山茶白者色勝玉產自麻源第三谷涪翁作賦始紀之羣  
芳著譜缺標目我家舊圃有此花不與紅紫爭麗華苧蘿  
美人含笑靨玉眞妃子披冰紗野人只解花前醉未經考  
訂分種類瑯琊王公淹雅才命題偶爲諸生試吾儕萬事  
忽眼前此花根種無能傳區區物產尙難辨鄉邦大者甯  
詳焉春風連朝動簾幕又見瓊瑤堆灼灼花今與我爲鄉  
人但願年年對花酌

南昌學宮摹刻漢石經殘字歌

一字石經邕所作表裏隸書光太學蘭臺私文志本汙鴻  
都鳥篆才原薄燾平立後兵火餘貞觀收藏半剝剝遺字

流傳拓本稀蚪甲鳳毛與麟角徒傳八石共相摹千九百  
字蓬萊閣崑山秀水互有考視宋較遠尤殘落後生無從  
見典型聖言同異滋穿鑿北平夫子今翁公日抱羣經事

商榷漢箋唐疏精髓摻倉沮史籀偏旁索遺經三段刻丁

酉一笑蓬萊有宿約先生從錢唐黃秋庵易處得尚書論

秋庵之先世真父先生讀書南屏山亦有小蓬萊閣

萊之題因以蓬萊宿約題其藏册之首云爾聚於所好

物必歸金匱本藏得參酌字體破缺雲霧遮凡爲半字碑

形高廣丈尺度宦貫猶堪證魯毛射聘依稀未斑駁公羊

隱四字十八郡陽所缺非參錯歸於一是眾論排詩歌文

筆兩超卓公時校士吾西江命工磨石去磽确腕力所到

蛟螭蟠議郎精彩猶騰爍六百七十有五字點畫天然謝

雕琢鐫成移置嵌宮牆多士先瞻氣歡躍公與西江舊結

緣卅載文風戒卑弱重將典故續蓬萊快竦精神峙匡嶽  
深檐蓋護永不刊諸生雜誦勤薰濯

題易田先生說劍圖

一永州太守王宸作一  
安邑宋孝廉葆愔作

易田老翁當代儒說劍先後有兩圖蓮心畫意不畫劍芝  
山劍與琴書俱翁口懸河證桃氏旨趣本與蒙莊殊我親  
几杖凡幾面咳唾落地皆經腴純鉤有七我未覩寒銚定  
使妖魅遁惟從畫卷資考訂臘廣如鬣誰知乎一椽老屋  
安几榻點綴雜以松杉梧紫陽山館正寒雨夜窗獨坐紅  
鐙孤龍身虎氣躍紙上引杯直欲傾百觚少年擊劍雖未  
學此心自許雄萬夫燭花翦穗吐光燄搦三寸管膽氣轟  
天晴從公得把玩規製請用溪藤摹

郴州晚眺

山色暮蒼蒼孤城赴夕陽春從三戶盡嶺接百蠻長遠樹  
浮空翠閒雲礙故鄉江間水清駛早晚下瀟湘

桃花

去歲今年心不同閉門長是負東風天桃莫更矜顏色只  
占人間幾日紅

王文誥字純生號見大仁和有韻山堂詩集

詩話見大工詩善畫好游覽名山大川嘗獨游皋亭  
諸山探梅至太平廢寺愛其二松奇古因易庵名自  
署二松居士鶴山龍泉精藍琳宇所至有詩後游嶺  
南以詩畫著名於公卿大夫間老始歸卜築於皮市  
蒔花種竹署曰南園其詩集初名二松庵游草稟旋  
失佚繼乃自編游粵時作日韻山堂詩集五七古雕  
繪山水窮及幽險尤能考訂故事富贍華麗其所注  
蘇詩集查馮諸家之大成平生瓣香在此而所詣則  
自成一格

神步山登青雲塔周覽鑑海之勝次明倪公尙忠石

刻韻

碧鑑彎環注上流，鳳林蒼翠滿城頭。  
兩峯左右收滄海，一柱西南峙廣州。  
雲路未遙偏鎖塔，神山得步便登樓。  
當年經始需民力，遺築今知有遠謀。

立錐面面水天寬，偃仄身如坐井闌。  
日色忽來衣上過，佛容陡落鏡中看。  
聖賢清濁惟評酒，耳目聰明孰具官。  
祇有名賢遺韻在，清輝常映月團團。

濂泉寺

石骨攪土土花碧，溜天飛濤瀉百尺。  
五泄輾趨壑底雷，谷應山鳴崩碧石。  
芒屨滑印苔蘚斑，冰花著衣珠跳額。  
輕身飛越萬湫龍，直從泉頂探泉脈。  
泉頂大陂列環堵，一半頽雲壓山脊。  
中通卷路里餘平，兩傍待建百人宅。  
水歸於此

百竅并湫流破肋走駉砮放下玉簾不上鈎怪石守之紛  
列戟人傳簾內竹林通悟入空門徑可跡瞿曇選佛兼愛  
身未肯形骸等閒擲瀑泉之上作道場傍水依巖創規格  
無端泉寺兩茫茫興廢亂麻難考覈青山白盡老僧頭簾  
下無人試雙屐空將演說導因緣一夢精誠動魂魄鏡公拾鐵  
佛頂自云我先蚤以筏喻參捨法何心究梵冊石頭高枕  
看泉飛松風謾謾吹茵席

月夜再至濂泉

海月漸藹空斜注一峯凸霜縞披山肩其趾列積鐵夜泉  
觸耳寒發我游興熱徑轉嘉樹陰繭步到山裂水簾月半  
垂簾動映澄澈背樹坐莓苔暗摸辨古碣移時月當頂穹  
林地成雪棲鳥忽翻枝散花空際擊零亂滿衣裾亭亭自



瑩潔俄覺蔽浮雲紛紛撲地滅攬之不盈手飄墮玉環缺  
三五闕珠龜疑有蟾蜍竊豈其朏魄影天嵬還未列乘陰  
竅山川和光不能泄人生類此境久要匪易結好景亦長  
明散去使心折夢入露氣清惟聞歌一闕瑤臺落步虛底  
事怱怱別酌酒滌塵慮隱映泉幽咽引指飛一光太虛無  
點綴三歎覓回蹤兀然見屹嶮遙待轉重輪山花已如血

從博羅取道游羅浮山

南游夙夢羅浮境發軔還疑夢裏來仙蝶遽遽因我化名  
山面面爲誰開蓮鬚拈出三千品華首參齊五百臺兼愛  
確乎堂上長箇中原有濟時才

度大屏諸山二十餘里一無廬木而雨至忽有古藤

一本覆若夏屋得息

童山曾曾絕人境十里五里鳴瀑泉巖盤谿屋百盤險經  
厯九曲乃在山之巔山巔溼雲起蓬勃風生兩袖飛濃煙  
大雨滿空壓頭頂滔滔奔響垂空天急呼避雨雨隨至鴉  
翻雲陣揮雷鞭衝雨過岬岬壁立上有古藤一本勢若羅  
修椽葉密結曾蓋萬根攫石蝟蟠而盤旋陰翳翠幄得神  
蔭石頭枕是虛中眠白晝暝暝銀海合栩栩化作漆園之  
游仙游仙亦在巫山臺爲雨爲雲去復來天若有情風覺  
夢斷雲零雨一吹開

霽後度大屏嶺始見羅浮二山隱顯雲外折下數里  
爲石角潭

峯變態樹倒影溼翠滿山人度嶺斷雨飄絲積靄收磨出  
光天照明靚遠眺羅浮接雲上支天一面與天併神山秀

出弱水中水複山重路猶梗石作梯大山中關流青  
泥天風一吹丸不得結成圭當前谿澗而爲潭潭復瀉  
水信無分於東西隨我下山如送客相將形影何淒淒言  
尋黍珠室綠衣行酒天雞噓洞天藥市引紅翠池邊沐浴  
分刀圭或再來無相睽

觀源洞觀葛翁筇化石唐時遊人入洞見石壁題葛  
翁詩有松門石徑茸芳草落花滿院香沉沉二句  
因足之

觀源洞外泉淙淙葛翁遺下青竹筇化爲石脊導我過馴  
擾如法騎龍公深入洞天春色曉松門石徑茸芳草落花  
滿院香沈沈媽紅淺紫無人埽玉女當年載酒來簫聲吹  
落鳳凰臺曲終都逐仙官去閒殺飛英點碧苔

登上界三峯從神湖望夜樂池還憩青羊石

罡風吹衣裂補綴來片雲禹步登上界下視雲中君神湖  
遙接夜樂水傍守青羊作長跪白環之樹丹剛林空青萬  
條玉間金風泉紛起響琴筑琅琅九奏八會調仙音東極  
天浮黎國老聃一開紫字帙舉授青真東海童尹喜元觀  
求不得求不得將何之先吾聞道吾之師聽請了角青童  
兒童兒爲言子可教可教隔一塵不見瓊花玉藥更翻新  
朝跨青鸞暮赤鳳白波滯淼連天津紅顏春樹一揮手日  
魂月魄自轉河車輪河車輪駐景方他時東海波不揚我  
騎東海青石羊太清上界封雲篆縹緲三峯環繞神湖光  
子盍求我樂池上神虎銷魔一軸開琳琅尹喜授記別童  
兒狡獪掉此舌東華玉女擊西盈神眞自向華存說上元

降敕扶廣山六甲靈飛授劉徹蟠桃歲熟閱三千尹喜頭  
顛卉回雪知否曾來學寶訣我今喚起石羊羣太霞一曲  
排空聞袖得三峯歸下界繪圖一炷妙香薰

尋軒轅集遺菴不得

軒轅道士素狡獪使我不見軒轅菴長安輕易走萬里故  
林何不停飛驂憶昔天街承祕旨道是金盤白鵲死更令  
老夫射覆乎上笑先生蚤知矣傍侍美女千桃花道士怪  
醜一笑差慌忙謝過面兀突人人涕泣鳩盤茶忽憶羅浮  
舊有宅荳蔻離支薦新碧草草書成四十年拂袖歸來山  
月白月白山青一舉卮髮垂漉漉酒如絲卽今何物爲芻  
狗用集皮日陸龜蒙空傳七字詩

呂公導余游飛水潭

笠屐壞色衣衝雨尋飛泉楓人蹶我後維摩導我前緣匡  
面峭壁震驚兩耳邊竭蹶赴山亭大叫龍噴涎急溜瀉巖  
肋下注礮礮穿破空一激響箇箇冰花圓忽爲蝴蝶飛十  
百迴翩躚撲散萬銀竹蕩開千鑪煙中窪一丈石跡之見  
藕船駕言汎天湖鼓柁凌顛仙

大洲

山水滌洞沍千里環高峽南靖連蒼梧奔流勢不乏登艫  
尋大洲其源瀉兩脅粵西山蜿蜒傾卸當天壓一枝盤旋  
龍水匯雙歧夾龍性鬱不舒節寸遭威脅一怒陡飛空奮  
張萬鱗甲引頸落大洲浪眺波歎飲天山地水靈分來江  
口插願汝學希夷瞑宜蟄龍法醉鄉不可沾那敢言荷鍤  
蒼頭倒做囊驚疑劍出匣

韓是升字東生號旭亭晚號樂餘元和人貢生有聽鐘樓詩藁

趙味辛曰先生襟抱灑落自言夜無塵俗夢性孝悌  
與人交久而彌篤早謝場屋未嘗忘世其詩斷自乾  
隆壬午爲始凡蹤迹之所經倡酬之所及以至居今  
稽古隨所感觸靡不於詩寓焉法梧門曰先生嘗  
謂余曰吾三十年前識味辛於京師後二十年乃識  
君京師名士大夫吾所往來酬接者不少矣而心所  
拳拳者君與味辛兩人爾近出其聽鐘樓詩藁屬綴  
語於帙尾余非深於詩者而先生之詩之深余固知  
其無所爲而爲者也求巧而險夷之列焉不求奇而  
正變昭焉風之嘘也雨之潤也水之流而花之放也  
夫豈有所爲而爲之者哉則澹夷之深於詩者莫先  
若矣黎二樵曰東老詩冲澹夷猶不卑不踰氣沛  
然而有餘聲鏗然其若留壽者之詩也潘榕皋曰  
三復大著大都以自然爲宗輔之以灑氣所云以杜  
白之真切運蘇陸之風神骨韻

者故當上揖唐賢下俯流輩

詩話旭亭好游覽多方外交入都館於禮邸爲檀

世子師次子既貴猶主講席授生徒晚歸鄉里自題

杖朝圖云就養京華近紫霄攜家會傍玉河橋歸來

十載沾恩重夜夜焚香拜斗杓自言詩學香山嘗爲

老嫗聽詩圖以見志伊墨卿題聽鐘樓詩藁云丈人  
清修自求福有子名臣萬事足天章雲爛畫錦堂月  
彩宵澄小林屋疏鐘罔記三生聽妙句編傳百蠻讀  
蘭若江南寺樓詞場薊北家家玉王公倒屣稱上  
賓縉黃撰杖推尊宿丈人自樂康節寓清時詎效子  
眞谷發舒忠孝託山水揮灑才華到松菊人云白傅  
在元和更擬南朝徐孝穆綬也少時牀下拜靈半  
編年會三復枉詩贈別喜名留惟驚日月雙丸速

六和塔

琳宮金碧燦峻極遠塵囂天水空中合雲山望裏遙一江  
分兩浙孤塔聳層霄會待秋風至還來看弄潮

月夜渡沂水

僕夫催曉發馳逐聲鑾出不一里已到沂水濱四鼓  
月未落水面如鋪銀水月一色白天宇無纖塵礪礪水底  
石躑躅車下輪人力費推挽馬足猶逡巡及茲感行役不  
如樂暮春舉頭見明月曾照狂歌人



過趙北口

隄邊楊柳拂征驂  
隄外湖光皎鏡涵  
無數打魚人放槳  
綠蓑煙雨似江南

山游卽事

微風送輕寒  
薄雲不成雨  
幽討事近游  
路出楓江浦  
小艇泊溪灣  
短杖策雲陽  
花繁賢相祠  
崖懸化人宇  
劍壁噴飛泉  
甘冽清肺腑  
峯回境益幽  
氣怯力仍努  
撫茲林壑美  
轉念風塵苦  
客夢黃金臺  
事過悔莽鹵  
故鄉殊可娛  
碌碌將何補  
出處判險夷  
賢愚審去取  
願攜買山錢  
傍石開蓬戶  
運甓惜分陰  
吾懷在千古

游華山

宿雨忽開霽  
山容淨如拭  
籃輿越層岡  
初地快登陟  
凌風

棧道幽三轉坡徑仄烏道滌飛泉松林漏疏日丹崖聳危  
梯猱升窮足力眾峯若培塿平楚渺無極髻齡此山游廿  
載猶瞬息事過境或忘身閒興彌逸芒鞋破蒼蘚短褐侵  
翠色山僧導前路歷歷如舊識淪莽足清娛雲山潤吟筆

澗上草堂

溶溶沙澗環謾謾松韻遠蕭然元亮廬敗壁封苔蘚我懷  
吟嘯魂跨鶴去不反薇歌壯有節清名晦益顯賴有通家  
生設奠編遺卷

門人潘稼堂談主於堂并刻遺卷

屋角澹斜暉疏鐘度遙

嶽

夢謁顧亭林先生墓得句云芒鞋踏徧七州土竹杖  
橫挑四嶽雲九州歷其七五嶽登其四先生語也  
醒時記憶遂足成之

秋窗忽作通幽夢，載拜亭林有道墳。  
落筆便關天下計，跨驢常載古今文。  
芒鞋踏徧七州土，竹杖橫挑四嶽雲。  
我是越江孤寄客，睡鄉聊與奠斜曛。

白馬寺與聖遷上人茶話

山居鮮塵事，杖策窮幽尋。  
言踰大晏嶺，古寺香山岑。  
獬犬吠來客，饑貍竄高林。  
上人別六載，頰上霜髭侵。  
意氣類嘯昔，談笑披胸襟。  
此時尙世法，何爾猶童心。  
得非凜師訓，不敢違遺箴。  
紅芳豔初綻，碧蕚香頻斟。  
疏鐘聽清越，夕照平湖陰。

坐白雲精舍兼山閣

忽從喧囂場，得此清涼境。  
閣界巖空地，僻塵蹟屏乳。  
泉滌煩窺人心，與之靜坐久。  
骨亦寒，眼合夢都冷。  
几榻無纖

塵翠撲松杉影

卽事效放翁

棲遲老圃息蹏輪  
剩有閒懷結淨因  
竊比陶潛詩責子  
懶爲毛義檄娛親  
適來良友傾家釀  
時對名花當美人  
午睡正酣茶正熟  
更無清夢落紅塵

不得游西山悵然有作

玉泉鳳城西朝暮  
橫紫翠松杉極蒼寒  
殿閣更宏麗前朝  
中涓墳大半香火寺  
長安冠蓋途十者不一  
至四度游京華  
擾擾負俗累茲來頗蕭閒  
滿擬策游騎奈何促歸期  
又理盧溝轡豈伊山水緣  
亦爲造物忌遷延實由人  
退轉乘怠氣譬若負夙逋  
未了心不置何當襍被來  
搜剔窮幽邃毋迫筋力疲  
而任年華逝勇決吾猶能  
預與山靈誓庶幾

鑒此忱一遂平生志

酬丁第五

青山荷鍤未必非翦桐爲帽荷爲衣吹竽彈鋏塵夢覺朝  
薤暮鹽生計微列圃種樹尋至樂河房宴坐能忘機第五  
之名勝驃騎士各有志毋相違

羨君有母壽且康樹諼堂北憂都忘同舟仙侶盡李郭揮  
毫名句凌錢郎秋風挂帆潞河渚落日弔古夷門旁歸來  
采蘭更捕鯉時時踰進瓊霞漿

包山紀游

我讀先公詩頗識包山勝積想二十年今始鼓游興嘉平  
月初吉帆自胥口進百里乘長風波光靜如鏡暮投消夏  
灣一村無二姓重門肅我入主人頗加敬越日游石公林

巒最明靚歸舟泊龍渚怪石列奇陣三宿枕山樓風雨入  
清聽壺觴樂晨夕淹留不爲病停午煙霧開飯罷理鞍鐙  
破臘梅解苞寒香逗樵徑林屋路轉幽仙源隔凡聖探奇  
學蛇行那復顧泥濘蝙蝠紅硃砂仙人綠雲鬢恍惚夢見  
之逢人作談柄斜陽下西巖枉道穿密蔭枇杷正著花古  
寺出清磬秉燭紀勝游累牘不能竟所嗟限重湖樞檣託  
身命來去衝洪濤後會那可定先公兩游覽遺翰實左證  
小子尋舊蹤按圖索神駿聞者或見疑到則真可信洪荒  
未闢前靈異於此孕一經花石網採鑿苦難禁山人指雲  
根云是朱劭贖良嶽今劫灰名山永留鎮吾亦旅泊人長  
歌等鴻印

樂餘東老歌

東老異上族不著姓名母夢日華而生  
日生於東故字曰東生席祖父餘業有

常稔田數頃幼多病不善治生家遂落讀書成誦  
輒忘嘗習舉子業屢躓棄法簿游燕趙越章貢  
間遇深林密箐名山蕭寺必窮其勝所至有題詠  
直白如話坦易交無貴賤善始終逢場作戲五  
履少以酒樓歌館亦偕其偶入都願簿不瞻朱  
十餘子官曹郎偕其偶入都願簿不瞻朱  
延爲世子師脫略懶散自若也主人頗優禮之一  
夕誦純陽子東老雖貧樂有餘句因以自號作樂  
餘東老歌

樂餘東老樂不休所樂不與常人侔常人之樂樂富貴食  
前方丈羅珍羞姣童豔姬列左右深居簡出同王侯鐘鳴  
漏盡夢隨覺白楊蕭瑟風颭颭東老少年饜梁肉水苗數  
頃貽先疇既遭蝨賊又水旱輸官不足增煩憂也曾挾書  
上光範黑貂空敝蘇秦裘歸來鬻田并瘞筆如釋重擔心  
悠悠出門但得山水趣入室那顧妻孥愁名韁利鎖兩拋  
擲此身宕往真夷猶行逢佳處便淹泊東西南北籃輿舟

吟詩不學杜陵苦直抒胸臆無雕搜舌耕差免凍與餒  
飧以外他何求簞瓢環堵出金石顏回原憲皆吾儔食留  
餘味飽童婢口留餘話无愆尤庭留餘地種花藥腳留餘  
力登山邱餘年餘事鼓餘興樂餘擊壤歌街頭

同周東田游極樂寺

入夏風仍顛清和竟罕邁懶過三眠蠶垂簾卧清晝有客  
造我門約向精藍扣畦寬藝雜花牆低露遙岫所嫌麥苗  
枯得雨或能秀老僧灌溉勤朝暮資井盃茶話晷影移虛  
亭做新構蘭臭淡忘言松花落盈袖

峽山寺用東坡和高要令韻

隨身一枝筇筋骸謝拘束天公於我厚不吝山水福南來  
下滇陽連峯如箭簇江流清見底倒映芙蓉綠石泉解娛



客

東坡句

此語聞已熟坡翁嶺表詩揮毫落珠玉峽山擅奇

勝游志我久蓄落帆凝碧灣一徑入禪谷佛桑花滿瓶榕

樹陰覆屋陰崖颯風雨白晝飄霧縠鹿就蒼苔眠鶴向澄

潭浴枯禪本色人

方丈貫庵

出世齊榮辱清修領徒眾儼若家

有督寶珠掠神鷹莫憚鉗錘酷茗飲長松林花落盈掬

一飯直指堂蔬筍飽充腹流連正忘倦那顧郵程促自離

十丈塵逍遙卸蹠轂行同打包僧雲水跡不跼況茲林壑

幽尤爲未經目人生苦纏縛周妻及何肉醯雞真可憐陟

險都畏縮我亦年向衰屈指五十六探奇嗜成癖山經隨

處錄未尋歸猿洞於心仍不足與僧訂重游山窗話翦燭

哭兄

同懷凡八人成立僅存五兩姊皆早亡寡妹已失侶相依

賴長兄敬事如嚴父雞窗共鐙火說經析訓詁廿載痛鮮  
民門戶仗兄主母氏享大年逍遙樂園閒奉潘輿升戲  
著萊衣舞正舉八十觴奄忽歸黃土苴杖行荒阡攀號裂  
肺腑終喪我北征分手泣南浦昨冬返吳閭離愁訴縷縷  
老瘦非昔顏言笑類先祖歡聚月一周商推訂宗譜我行  
許姪隨旋撥珠江櫓迢迢六千程並無別離苦跋涉未甯  
息郵書達幕府初言病纏綿尙冀參苓補繼言藥無靈撒  
手成千古先期遣姪歸棺衾不及撫我罪那可逃事過悔  
葬鹵終天恨無窮旁觀尙酸楚況我骨肉親如身失一股  
哀雁不成行秋風淚如雨

胡忠簡公祠

一疏誅姦檜廬陵俎豆馨洲臨鷺鷥白嶺對鷓鴣青瘴海

歸臣骨冰天隕帝星平生深恥在求活小朝廷

寄妹用少陵韻

同胞惟剩汝臨老奈頻離鬢改人還健家貧屋已移松心  
凝晚翠桐樹長孫枝饒有含飴樂無須淚暗垂

閱藤陰雜記寒寓爲梅村祭酒故宅漫成一律舊有

錯比楊雄宅異代應教  
庾信居柱聯今失去

班馬才華重石渠城南尺五有遺墟浮生閱世原如寄今  
歲移家此卜居枯樹尙傳庾信賦元經曾草子雲廬文章  
那敢輕前輩太息空留卻聘書

長椿寺明孝純劉太后像按像凡四軸崇正太后母  
瀛國太夫人徐氏指授畫

工仿照后姪新樂侯劉文炳季弟右都督文照  
面目頗得形似此其一也見魏叔子新樂侯傳

長椿古寺斜陽裏鐘板蕭條增暮寒香火一龕孝純后莊

嚴七寶比邱冠未經浩劫圖遺像猶幸先期奉佛壇百六

十年題字在如何都作九蓮看寺故有慈聖孝純及田妃三像兵火之餘僅存此軸

自康熙間唐東江詩誤認慈聖好事者紛紛題詞據為故實頓首泥金小楷有崇正庚辰恭繪智上菩薩十字都未

審視是賴後來之考正耳

### 次韻答法時帆祭酒

麥秋風雨多掩關鬱懷抱所思玉堂仙遠在長安道去年

挂歸帆秋風肅清昊聯舟御李膺於喁疊成草昨歲於舟次識治亭

漕使唱和成帙一亭更一堠古跡共幽討新知雖云樂不及詩龕

早詩龕法平等宏獎及衰老尋山必借游得句輒稱好癖

嗜疑阿私中心互傾倒檢點游囊中猶有贈貽橐膠城講

席寒僻近海東島雙鯉獲素書離愁一時掃叮嚀慎眠食

壽命可長保敬奉釋氏文無苦亦無惱

經張南華宮詹廢宅

榮遇當時過謫仙詩成法戒進經筵雙清孤閣明殘照一  
任狐狸上閣眠

鍾大源字晴初號筍溪海甯人有東海半人詩集

詩話筍溪有俊才弱冠受知於阮文達壯嬰沈痾猶  
不廢學文達稱其遇益遠志彌厲卧游宗圖之中冥  
覽荒徑之外亦可謂奇士矣其詩才思橫溢光燄熊  
熊陶篁村評古體高者不減杜韓近體直追王孟降  
格爲之猶足以抗衡蘇  
陸掄揚太過非定論也

暮春書興和潛山丈

淡沲暄風霽景成幽居闐寂未須名蒼苔被徑少人跡紅  
雨潑簾多鳥聲藥譜茶經情每寄吟鞭畫舫樂慵爭無端  
一晌看花夢春色分明似錦城

讀漁洋感舊集偶書

文人善相輕每恐峻厓岸矧以軒冕流而爲風雅冠蠶尾  
樂宏獎風流久未換論交多寒瘦此意益足歎搜羅暨倡  
酬盈篋富詞翰隻字絕詆諆片語亦珍玩隱霧豹必窺潛  
淵珠使燦如辨竹中笛似惜桐遭爨品題一時加聲稱百  
年煥沽譽豈初心揚挖不嫌濫從知名下土布衣每居半  
騷壇文采留曷可歸黯淡迄今把遺編詞瀾紛浩瀚仲翔  
冀知已得一可不憾揜卷緬前哲定各莞爾粲

苦雨和竺巖

深下簾波一事無愁霖添得睡工夫堂坳水聚黑蝌蚪牆  
角樹鳴青鶉鴝篔簹冷如冰宵藉禡衣潮生醜晝烘鑪思光  
不礙牽船住瓦屋油衣亦易濡

次韻友人夏日別墅卽事

拓得幽棲地數弓日長小隱伴園翁鳥銜蟲立竹梢上魚  
負子跳萍葉中苔徑曉沾雙屐露溪橋涼受一襟風避炎  
我厭瓜廬窄可許攜來短榻同

九日書懷

脫帽清狂讓昔曹難扶病腳試登高笑拈舊日三錢筆漫  
詠今朝五色餽薄有栢梓情自適了無風雨興原豪遙知  
衡嶽峯頭客望遠思鄉一倍勞

呈周松靄夫子卽敬題詩文集後

百川從東來溟渤洪纖瀦鰲波勢蜿蜒潮汐晝夜趨兩峯  
拔地起屹然闢門樞羣山匝相向蒼翠清雙曠以茲動峙  
秀蔚爲文物區名儒代有作約舉甯云誣經義闡橫浦詩  
派盛悔餘夫子與曩哲後先眞合符早歲知六甲誦習勤

居諸天賦特高朗慧業疇能如牙籤三萬軸一一窮根株  
經史百家學采擷皆膏腴下筆有神助揮灑雄千夫文足  
修五鳳賦欲超三都二十折郗桂展翼鵬騫初膠西策旋  
獻飄忽凌子虛名登淡墨榜手拆紅綾書策馬花簇錦預  
宴桃含珠翩翩眾爭目風度何容與謂當列清美簪筆承  
明廬校讎近天祿同異標石渠聲名壓班馬製作摩嚴徐  
庶幾馨夙蘊不負胸中儲然聞經術用內外無或殊郎官  
應列宿所貴繇通儒文翁昔化蜀千載貽良模夫子設吏  
治守此長不渝得官赴嶺右古邑龍城隅下車誓飲水蒞  
屋和風敷依桑童子樂拔薤強宗除與民共休息來暮歌  
歡灼訟庭百無事心跡瑩冰壺閒儒响吟筆文獻徵蒼梧  
偉行表彰亟佚事蒐羅俱功不數范瑗博豈誇楊孚狀嫌



草木簡志陋虞衡疎書成媿康趙體例近所無儀州亦勝  
地公暇幽懷攄捲簾據琴閣景物如披圖錦繡江齒齒蚰  
蝶山蘧蘧繁香離支熟濃蔭枕椰鋪蠻煙暗孔翠瘴雨嘒  
鷓鴣鄉心每撥觸夫不吟歛歛從來賢達意捧檄爲親娛  
無何闕迎侍遠道嗟盤紆南山摧喬木惡夢鴝鵒呼趨裝  
不隔日矯首雲模糊輕舟鬱林石一葉還鄉閭歸披束暫  
句抱恨增長吁慈暉幸可報強奉花間興蓼莪遞廢詠慘  
鬱尤難舒三釜背色養空羨林間烏因之不再出心益卑  
華廡三逕秀松菊安此寂莫居貧堪傲彭澤清本同萊蕪  
但欣著述富不問歲月徂庭無驚飛雀戶有好事車到眼  
茂桃李侍膝借璠璣質疑及豹鼠釋物先蟲魚英才仰眩  
洽樂育咸相須青雲每接武藉甚收時譽賤子少志學材

質儕薪樗藏拙雅宜稱痼疾嬰微軀詩篇賴陶冶里調呈  
皇琴拂拭有盛意不以固陋拘韓門列島可歐氏稱聖俞  
自眎直萬里奚止非其徒名山業許覩冀可裨顛愚醞釀  
何深厚細帙開瓊琚詞氣逼漢魏格律兼杜蘇管窺縱難  
盡至味供尋咀雙聲疊韻祕餘事分精犇鉤駟復格磔詰  
曲還崎嶇論著驚俗耳欲讀翻齟齬才大眾長會下學空  
喁喁寒窗白醉暝把卷微吟唔詞瀾障爭倒試手同提扶  
豈徒貴文采足潤枯腸枯琅琅誦不輟願欲萬徧踰作詩  
志趨向恐笑仍拘墟

寄題武林郡署東坡手植雙松歌

峨嵋玉局天人流元祐作守來杭州兩湖濬後葑草雍長  
隄築罷垂楊柔爲民種德難悉舉退傅而後公其尤政閒

鈴閣淨於水雙松間植庭之幽碧雲圓合葉常滿黃雪細  
糝花初稠偶偕枯衲證禪悅閒邀冷宦聯吟謳怡顏應與  
此松對藍田丞署能同不迄今幾閱七百載公雖仙去松  
猶留根蟠力壓雷雨拔幹攪怒偃蛟龍道煙釵霧鬣互掩  
映古柯老枿恆蚴蟉後人見者歌勿伐不數邵武誇安榴  
迴思公也立朝寧歲寒之節驚同儔建言抗直忘忌諱賦  
詩奇崛憑搜求去杭而後迹靡定一官轉徙炎荒投梅花  
嶺外行躑躅枕椰樹底聞鈞斡雪泥鴻爪不再至側身東  
望成阻修松風亭子僦居日得無觸物增羈愁平生敬公  
入骨髓公之磊砢松應伴惜余坐此腰腳弱之而鱗甲觀  
無由畢宏韋偃世誰及爲我畫取懸齋頭配以笠屐之圖  
像須麋謾謾同千秋清臙畫捲翠濤瀉勿使化作雙長蚪

中秋玩月憶舊游作歌

寒煙如織風颺颺  
綠絲雨密飄復休  
木犀狼藉固足惜  
還恐良夜孤中秋  
天公不隨人所料  
更餘夜色開清幽  
魚鱗碎作霽雲片  
須臾并少纖毫留  
碧空如水一萬里  
東海早見飛晶毬  
紗櫺淨映色皎皎  
冰簾寒透光油油  
滿衣冰彩不敢拂  
臙融但訝搖雙眸  
中庭片地白於雪  
影交竹柏疑雕鏤  
清光如此不可負  
逍遙誰繼承天游  
閒人之閒莫如我  
惜哉瑟縮同瓜牛  
憶昔輕強遇此夕  
乘興直上章門舟  
榜人解意溯空濶  
艣搖拍拍飛沙鷗  
生綃萬幅忽倒捲  
溼銀千頃還低浮  
西山嵐氣撲四面  
南浦樹影搖中流  
危檣隱現隔遠靄  
漁鐙散亂隨浮漚  
俯訝鏡忽波底墮  
仰怯星欲空中投  
舟行那復記炳燭  
酒徒拉雜舒清謳  
座中有客

善水調和以鐵笛驚潛虬噴波一躍勢可怖珠光錯落誰  
能收少焉人靜月趁午涼颺清露相夷猶置身渾似廣寒  
窟飄飄逸興仙爲儔於今渺忽若夢寐安棲幸較他鄉優  
閒吟靜玩意未足鄰家美醞無妨求姮娥勸汝一杯酒莫  
便匿影蛾蟬修來宵光景縱未缺何異隔歲生離愁況復  
陰晴未可度徑須達曙傳觥籌雄雞更勿遽膈膊燭龍穩  
卧樽桑洲

南宋方鑑詩兔牀丈索賦

鑑重四斤有奇兩耳四足

蘇漢臣監督姜氏造至德壇用凡二十字舊爲先生收藏值觀察秦公建蘇文忠公祠於西湖先生奉此鑑爲燭燎之需其詳見自序并賦長歌邀諸人同作云

嗜古延陵翁古器每珍蓄漢鼎砂痕黃商彝薛斑綠有鑑  
其形方吉金製殊橫流傳宋中興屢寓尙方目圓非卓一

峰平不敵四足奇文雲雷旋奧篆蚪斗伏深鑿表款識一  
一可捫讀畫院開封蘇實董治氏局得非姜孃子亦領鐵  
官祿日供至德壇想見禋祀肅醴酒功德舞伐鼓送迎曲  
非同上清殿焚醮百神噴免登宣和圖合續夢華錄紅羊  
劫不灰藏弄等韞櫝顯晦物有候辦香果誰屬峩峩梁溪  
公坡祠聖潮蠶匏樽薦清醕寶錠貯華燭何以助德馨此  
鑪庶不辱無怪先生甘潔手置祠屋矧迺屬國齋或衍太  
峨族遺苗昔監鑄應亦長公欲從茲瀛嶼旁歲祭蒸沈藿  
氤氳醜鵠中奎宿靈往復更求藥玉船再拜奉醪醑

西漢定陶共王陵鼎歌

漢家孝惠踐炎祚封地旣削聞梁王隆準子孫就藩位惟  
恢實始膺雄疆詔諸郡國立高廟俾奉尊卣歆丞嘗定陶

之鼎亦其一繆篆二八銘都倉長陵草沒井火熄舊物淪  
落無何鄉僅從博古認款識鐵官鼓鞴空精良今茲古鼎  
製殊樸范自何代來何方通高七寸器殺半蓋疑孟覆形  
圓鐺三環列非一峰卓兩耳峙並三足強雷紋篆帶品莫  
定六夔三犧名難詳西漢陶陵字可辨供廚好時應相當  
中丞好古識精審邈父南仲均慚惶定爲共王陵祭器扶  
風共祀逾千霜未入宣和舊圖錄形質一一煩衡量累黍  
相差篆畫別知非初載升馨香共王諡同名則否孝哀往  
事殊難忘傅氏昭儀後宮最誕毓龍種看騰驤三轡舊國  
藉屏翰維城誼篤非恆常況復承華嗣主鬯材藝素負夙  
德彰身嗣前星表環極子承景祚誇當陽推親典並顯尊  
重報功事與追遠長想見順時潔粢盛斯鼎長奉園陵旁

獨遭新莽覆公餽太阿倒握權勢張奏貶尊號及帝母天  
家骨肉情殊傷竊懷璽綬事烏有妄以私怨憑黃腸穿塋  
竟忍遣謁者發邱恍已添中郎金盃煙銷土斑駁寶衣火  
化雲蒼涼休訝魚鐙照夜密空憐燕影啣泥忙高冢崩隕  
百物毀眯眼惟歎荆榛荒流傳此鼎獨堅好不隨劫燄歸  
蒼茫愛等周家虎彝皮珍同虞氏雖敦藏莫問鄭刑暨妘  
婦漫稱雕豆兼玉觴所惜銘辭異器蓋雄鴛彷彿離雌鴛  
何當更覓吉金偶珠聯璧合增輝煌生砂活碧敢褻視西  
京法物留滄桑總然得一亦已足寶氣上燭浮雲光絕勝  
汾陰禪祀畢長淪彝器波湯湯

焦山舊藏周鼎今以西漢定陶鼎置焦山詩以紀事

呈中丞夫子



神物有顯晦兩美期必合重寶傳周京彝器紀漢臘緬思  
鼓鞞初星躔各千匝匹如劍雌雄延津未相狎一鼎蹲祗  
洄萬古不摧拉遠傍焦先廬江雲護重沓粹質驚蛟螭寶  
氣燭閭闔文奇雲雷旋狀古饕餮壓格右釋最精內門辨  
尤洽無專暨世惠一一參祕笈銅狄休誇仙石碣倍勝獵  
流傳夏商後錫命孝思答過客事摩挲不暇探梵夾矧誇  
賦玉帶處士留賜牒巍然獨稱雄何物足相躡祭器共扶  
風炎劉司職納鍍銘認定陶封地濟陰接辭雖異都倉孝  
元事殊協想賴調滑甘用享沸吹欲形兼盃匱尙腹受升  
龠合降神酒釀鬯升馨氣焚蒹井火類灰滅劫燄甚波渣  
玉魚隨銷沈金盃枉嘔嚔舊物留烝彝新占非噬嗑端合  
儷邾鄔法物得雙恰京口舟可航安用淪濟潔載將東京

遺兼叩西竺法並峙輝旃林分別照花塔製殊齋鐘懸響  
類粥鼓鞞或可藏毒龍未許飼怖鴿聯同奎璧珍鑄豈金  
鐵雜永鎮枯木堂世守白足衲佳話佚前代勝事載新剏  
跋過醜舫工句奪蠶尾愜何時三詔峯一棹問禪榻試手  
量鉉銑論古謝謄諸吉金得奇耦我佛笑且塔岐陽共瑰  
怪汾陰任蕭颺躑家注重繙甄豐本同搗勝尋瘞鶴銘江  
許屐頻蠟

次韻答蘭舫見懷

微黃病葉墮疎林剛值君來踏葉尋又喜魚緘衝雨至不  
隨鷗夢與波沈雅人心醉原如酒知己情多豈在金況有  
新詩能寄我清於瘦玉七條音

上巳霞莊阻雨不果來和詩寄示疊韻答之

不管重三節候來雨師刻意阻流杯溼雲昨日又今日孤  
棹欲開仍未開卅里空濛遮望眼一春黯澹負詩才若償  
舊約須新霽定要朱櫻綠筍催

夏宗沂字約千號蘭臺江陰人諸生有浣花集

詩話蘭臺少有文名召試不遇客游  
皖江詩有格韻蘊藉天然謝去雕飾

申浦謁季子祠

季子祠堂薜蘚深寒林疎徑獨來尋幾家煙火成村落滿  
目江山自古今碑卧尙留宣聖筆波喧如聽魯廷音夕陽  
喬木空墳在尺土何關讓國心

九日過圓覺庵值蓼洲叔出示登高詩次韻

正擬留題護碧紗寺僧傳迓李邕車蒼茫懷古歸詩卷老  
大悲秋對菊花斷壑有雲多挾雨廢陵無樹不嘯鴉登臨

慣作傷心語，萬里愁空掩月華。

閨情

庭樹暮棲鴉，秋風入樓角。誰遣落葉聲，空闌先獨覺。

昭君

千秋塞北傳青塚，萬壑歸州有舊村。不是琵琶成遠嫁，年年明鏡老長門。

文君

別鶴求鸞寄爨材，風流勝地說琴臺。長門尚有迴車日，那怪當壚不愛才。

晚晴移詩匯卷一百十終